

Pertgè n'è la professura rumantscha a la SPF ed a l'universitad da Turitg anc betg occupada?

■ (anr) Avant bundant in onn ha Iso Camartin visà sia professura per litteratura rumantscha a la Scola politecnica federala (SPF/ETH) ed a l'universitad da Turitg. Enfin uss è vegnì fatg tant sco nagut per tschertgar in successur. Avant l'onn 2000 na vegnì il post probabel betg occupà, hai gì numtar la SPF. In nuv per l'agir plitost pacific datti a l'universitad. Il rector da l'universitad da Turitg, *Hans Heinrich Schmid*, di en quai connex: «Nus stain sut in'enorma pressiu da spargnar. La professura rumantscha saja vegnida introducida a sias uras da la SPF pervi da motivs cultur-politics. L'universitad saja sa participada ed haja pajà l'infrastruttura, la SPF haja rembursà la paja. La davosa giada che l'universitad haja gì contact cun la SPF, haja lezza fatg da savoir, ch'ella saja da principi pronta per ina cuntinuaziun da la professura. La SPF haja dentant dumandà sche l'universitad sa participass finzialmain pli

fitg. Per il mument stettia la chaussa airtar els. La professura restia, mo na vegnia betg occupada e las perspectivas sajan turbles e maschedadas. Ad interim vegnia ins pia a dar vinavant sulet incumbensas d'instrucziun. Pli concret na dat Schmid betg pled e fatg: Igl onn 1999 duessian las universitads survegnir dapli daners dals chantuns per ils students. I dependia in pau quant che l'universitad da Turitg survegnia.

Novs chaus

Schmid remartga plinavant ch'i haja dà grondas midadas a la testa da la Scola politecnica federala. Entant ch'antierius exponents sajan s'engaschads fitg per la professura rumantscha, sajan ils contacts tar ils novs exponents probabel anc d'intensivar per quest intent, suppona Schmid. In sumegliant motiv per il retard vegn era fatg valair da *Rolf Kappe* ch'è menader da la partiziuon da scienzas umanas a la SPF. A questa par-

tiziun appartegnia era la professura da litteratura rumantscha. La direcziun da scola da la SPF saja sa midada quasi dal tut entaifer il davos onn, quest aspect na dastgia ins betg tralaschar, puntuescha Kappel.

In pau pli optimistic tuni tar la SPF

En la davosa sesida dal cussegl da la SPF saja la demissiuon da Camartin vegnida tractada. Quai ha *Katharina Poiger* che sa fatschenta uss a la SPF cun la professura rumantscha ditg envers l'anr. Il remplazzament da Camartin na saja betg ina dumonda dals daners. La piazza possia dentant vegnir scritta ora il pli baud la fin da quest onn, calculescha ella. Era sch'i dettia probabel mo paucs candidats pussaivels per quest post vegnia la SPF a preparar minuziusamain l'elecziun ed intercurir l'abilitad dals candidats. Ins veglia la fin finala tegnair il nivel da scola auta ed ins fasschess na-

gut dal bun a la Rumantschia sch'ins fasschess la procedura a la bahuta. Pia na possia la professura probablmain betg vegnir occupada avant l'onn 2000.

Ils students rumantschs prest sin via?

Durant il semester d'enviern han *Ricarda Liver* e *Clà Riatsch* adempli intginas incumbensas d'instrucziun en il rom da la litteratura rumantscha. Durant il semester da stad porscha la SPF nagut als students che s'interesschan per il rumantsch e co i va vinavant l'atun proxim n'è anc betg fixà. L'universitad da Turitg porscha il semester da stad lecziuns linguisticas da *Georges Darms*, *Carli Tomaschett* e *Wolfgang Eichenhofer*. Mo tut quests docents èn engaschads fermamain en l'universitad u en lavurs, uschia ch'ina tgira cumpletta dals students a Turitg e da lur furmaziun nun è garantida sin il champ rumantsch.